

石
匱
書
後
集

石匱書卷第二十五

左良玉列傳

寧南侯者姓左氏名良玉字曰龍山遼東人也
少起軍校以斬級功官遼東都司苦貧常挾弓
矢射生一日道傍馳索馳馬刼取之乃錦州軍
裝也坐法當斬適有丘磊者與同犯顏獨任之
良玉得免死既失官久之無聊乃走昌平軍門
求事中丞侯恂中丞常後使之命以行洎冬至

燕上陵朝官良玉夜大醉失四金卮旦日謁中
丞請罪中丞曰若七尺軀豈任與客哉吾向誤
若非若罪也會大凌河圍急詔下昌平軍赴救
榆林人尤世威者為總兵官入見中丞曰大凌
河當天下勁兵處圍下易解世威當行今既以
護陵不可公且遣將誰當往者中軍將王國靖書
生也左右將軍更不可任中丞曰然則誰可世威
曰獨左良玉可耳顧良玉方為走卒奈何師諸將

中丞曰良王誠任此吾獨不能重良王乎即夜遣世威前諭意漏下四鼓中丞竟自詣良王邸舍請焉良王初聞世威往以為捕之繞床語曰得非丘嘉事露耶走匿牀下世威排闥呼曰左將軍富貴至矣速命酒飲我引出而諭以故良王失色戰慄移時乃定跪世威前世威且跪且掖起之而中丞至乃面與期詰旦會棘門大集諸將以金三千兩送良王行賜之卮酒三令箭

一曰三危酒者以三軍屬將軍也令箭如吾自行諸將士勉聽左將軍命ノ將軍今已為副將軍位諸將上吾拜官疏夜即發矣良玉既出而以首叩棘門墀下曰此行倘不建功當自刎其頭已而果連戰松山杏山下鍊捷功第一遂為總兵官良玉自起謫校至總兵首尾僅歲餘年三十二是時秦寇入豫良玉當往勅見中丞中丞曰將軍建大功殊不負我欲有言以贈將軍

將軍奚字良玉曰無也中丞咲曰豈有大將軍
終身稱名者哉良玉拜以為請中丞曰即崑山
可矣自此乃號為崑山將軍良玉長身類面鰲
勇善為左右射每戰身先士卒既至豫則向所
苦賊帥一斗殺蝎子塊滿天星等皆平最後戰
懷慶與督府意不合乃歎曰吾即盡賊安所見
功乎遂陰縱之而寇患始大熊文煥者繼為督
府常受賊金而脫其圍良玉尤輕之後揚嗣昌

以閣部出視師倚良玉不啻左右手九調而九
不至嗣昌怏怏死丁啓睿代督師則往來依
違於其間為良玉調遣文書未始自出一令時
人謂之左府幕客然良玉立功最亟威名重一
時強兵勁馬皆在部下流賊呼之呼為左爺
壬午八出兵與李自成戰朱仙鎮三日夜而敗
良玉還軍襄陽初良玉三過商丘必令其下曰
吾思府家在此敢有擾及草不者斬入城謁侯

中丞拜伏如家人禮不敢居於客位朝廷知之
乃以侯恂代丁啓睿督師良王大喜踴躍遣其
將金聲垣率兵五千迎督師督師既受命而朝
廷中變乃命督師拒河援汴無赴良王軍良王
欲率其軍三十萬覲督師于河北督師知糧無
所出乃諭之曰將軍兵以三十萬稱盛然止四
萬在額受糧實又未給度支今速來就我國善
茅散其衆則不可若悉以來而自謀食咫尺畿

輔將安來之卒不得與良玉軍會米幾有媒孽
之者督師遂得罪以呂大器代之良玉愠曰朝
廷若早用侯公良玉敢不盡死今又罪侯公而
以呂代是疑我而欲圖之也自此意益離遂往
采江楚為自豎計畫取諸鹽舡之在江者而掠
其財賊帥惠登相等皆附之軍益強又常稱軍
飢欲近南京就食移兵九江兵部尚書熊明遇
大恐請於侯督師以書諭之而止朝廷不得已

更欲為調和計封良王為寧南侯而以其子夢
庚為總兵官良王卒不為用燕京陷江南立弘
光馬士英阮大鍼亂政湖廣巡按御史黃澍上
疏叅之士英差緹騎至楚執澍良上殺之提兵
向關清除君側之惡傳報討馬士英曰蓋聞大
義之重炳於星日無禮之遂嚴若鷹鷂天地有
至公臣民不可罔也奸臣馬士英者棍本赤身
種遺藎面昔冒九死之事業已難髮為僧重荷

三宥之恩終思反面作賊會當國家多難後言
定策首功以今上膺數之歸為私家貽贈之物
竊弄威福煬蔽聰明時兵力以脅人致天子閉
目搖手矯偽旨以讐俗俾軍民重足寒心幻蜚
蔽天奸螟障日賣官必先姻婭試看七十老囚
三木敗類居然節鉞軍中漁色周諫居覲託言
六宮粉黛八百嬌娥盡是朝歌濮上江而無夜
安之挑斗北有朝簪之星群小充斥於朝端賢

良伏竄於巖谷同己者性侔豺虎行列豬猥如
阮大鍼張孫振素弘敷數十巨懸皆引之為羽
翼以張殺人媚人之赤幟異己者德並蘇黃才
婉房杜如劉宗周姜曰廣高弘圖數十元老聚
誣之為朋黨以快如蛇如虺之毒心而乃鯀水
興波冰山發燄放崔魏之瘼狗遂余負隅收關
獻之沐猴教以升木用腹心出鎮太尉朱泚幾
至殆有甚焉募死士入宮宇文化反之所為人

而知之矣道路有口空憐職方如狗都督滿
得之謠鬼神難欺最痛立君由我朝廷性命之
句嗚呼江漢長流瀟湘罄竹數此之罪寧有既
與近日皇嗣幽囚列祖怨恫海內懷忠之士亦
念韓厥存孤教國向化之民豈無少康一旅本
藩先帝舊臣招討重任頻年痛心疾首願為
鼎邊雞犬以無從此日履地戴天誓與君側豺
狼而併命在昔陶八州靖石頭之難入義於今

炳然迄今韓蘄王除苗傳之奸臣職如斯方盡
是用勵兵秣馬問罪興師當鄭畋討賊之年憶
裴度閉邪之語謂朝廷奸黨盡去則河北諸賊
自平今藩一腔熱血鬱爲輪菌離奇勢必百萬
雄兵化作蛟螭妖孽崑岡失火玉石俱焚楚國
亡猿山林延禍疾雷不及掩耳劃電詎可逃形
殺即獻俘禽難肆赦嗚呼朝無正士誰斥李林
甫之奸邪國有同心素抱鄭虎臣之激烈我

祖宗朝三百年養士之報豈其決裂于食壬大明國十五省赴義之心正宜暴白于斧鉞燃董卓之腹膏溢三旬籍元載之厨撤盈八百神人盡快中外甘心謹檄報至南都士英胆落移黃得功屯重兵於姑孰待之時良玉抱病已久此來為黃澍所主非其本心舟行詎以就醫至江州總督袁繼威逆謂之曰太子非真未可造次良玉急傳令箭諭各營軍士毋動江州一單一

未三鼓後軍士竟破江州劫掠甚慘次日良玉
升帳將治亂兵之罪怒罵裂帛嘔血數升是夜
即卒夢庾提兵東下遇英王師至遂以其軍降
清

石匱書曰左寧南真摯開爽人也而為黃澍所
弄黃澍挾左師而叅士英挾左師而殺緹騎挾
左師而傳檄南都挾左師而稱兵向關倘使寧
南不一至蕪關則黃澍何以寔其言曰討賊比

石門書 卷一
皆游之所以顛之倒之而使寧南受此惡名也
余友泰興柳生為寧南客說寧南事慷慨淋漓
繼以涕泣余謂信如余言則寧南之不及也明
甚則雲夢之游可以不縛而吾且追恨韓淮陰
之客無吾柳生也

石匱書卷第二十六

錢謙益列傳 王鐸列傳 闕

石匱書卷第二十七

洪承疇馮銓列傳 闕

石匱書卷第二十八

劉華揚劉績沁李鄺蔡列傳

劉斯球號大容江西南昌人萬曆丙辰進士由
吏科都給事陞大理寺右寺丞崇禎中推石倉
都御史命未下國變賊誅金創甚清師入間歸
田居及金聲桓反正清呂固山譚大率京兵恢
復斯球隱紫溪絕跡城市己丑春正旦斯球以
主歲預挂一單堂柱黎明各冠帶儼未意私臘

其祖仇者高承寵偵得之以脅斯珠責貨不滿
偽告密于清、以密騎猝就其家廟擒之則戮
冠大袍髮完加網如明制時督撫朱延慶欲姑
生之譚太不可必以為違清并其子明經北京
武學教授元鑑于二月十三日父子對戮於市
幼子元鑑避他處不及難又上元吳溪章亦宦
裔常一見金聲桓江石中興檄持歸吟哦不去
口以殊革顏色之復加評贊有殺奴勸此紙聞

當事當事疑其與聲桓合刑之通市頭既落身
移時不倒行刑之人亦驚遁去

華允誠號鳳超普州無錫人天啓壬戌進士癸
亥選工部都水司主事會魏奄用事諸名賢皆
放逐允誠假歸崇禎己巳起補營繕司主事尋
陞員外郎其冬東兵入塞都城戒嚴諸曹郎守
城門多以守禦不備扶闕下有死者而允誠守
德勝門獨完調兵部職方員外乞休不允允誠

見當時銓閣比周舉錯拘私上疏言三大可惜
四大可憂可憂一條言國家罷設丞相用人之
職吏部掌之閣臣不得侵焉今次輔冢臣以同
邑爲朋比惟異己之驅除閣臣兼操吏部之權
吏部惟阿閣臣之意線索呼吸機關首尾庇同
鄉則送黨可公然保舉排正類則講官可借題
逼遂又言喪師誤國之王化貞宜正罪潔已愛
民之余大成有可殄疏入奉旨切責回話又再

疏直糾次輔溫體仁冢臣閔洪學罪狀言尤切
直體仁洪學疏辯幸上明察頗得其情允誠僅
得罰俸未幾以終養歸上尋釋余大成於獄寔
王化貞於法遂唐世濟而罷閔洪學皆用允誠
之言里居十餘年而有京師之變南渡後起補
吏部驗封司員外郎署選司事允誠見時事日
非曰內無李趙外無韓岳欲為建炎紹興亦何
可得遂謝歸南京陷允誠帷飾巾待盡杜門者

三年戊子以不剃髮爲人所告執去見救從孫
尚濂字靜觀年十九平日舉動皆效允誠同日
遇害允誠登第出賀文忠之門而師事高忠憲
嘗師弟子靜坐終日如泥塑人忠憲臨難特書
一帖授允誠曰心如太虛本無生死是時允誠
遂豁然於生死之際矣臨刑神色不變義僕朱
孝薛成送死

楊廷樞蘓州吳縣人舉崇禎庚午南京解元以

文名世學者稱為維斗先生乙酉金陵失守廷
樞携其妻費氏并其女匿洞庭山中三年不至
城市一日為縣官所跡報聞土國寶差兵擒獲
諸校縛置舟中索筆墨不得咬斷一指以白衫
寫遺囑曰蘇州有明朝遺士楊廷樞者幼讀聖
之書長懷忠孝之志作士林鄉黨之規模庶幾
東京郭有道負綱常名教之重任願為宋室文
山為孝廉者一十五載生世間者五十三年

嗟時命之不猶未登朝而食祿值中原之多故
遂蒙難以捐生其年則丁亥之歲其日則孟夏
之中方隱山阿忽罹羅網時遭其變命付於天
雖云突如其來亦已知之久矣有妻費氏歸余
一十餘載有女觀慧年已二十餘齡罵賊全貞
不媿丈夫氣聚舍生就死絕勝男子鬚眉一家
視死如歸舉室成仁何恨但懷忠莫展報國無
能未竟生子欲完之事尚辜累朝所受之恩魂

烟：而升天願為厲鬼氣英：以墮地將待來
生舟中誓此不能盡言留此血衣付兒來訣如
痛父母即思忠孝罵畢付諸校曰小兒來贖必
有以相酬幸藏之毋失諸校擁見國寶國寶下
堦相勞曰楊先生負天下重名奈何不自愛尚
靳此數莖髮以自取慘辱耶廷樞曰廷樞世受
國恩不能即死以報先帝報願寔甚今既見
收有死無二惟願殺以遂生平國寶曰楊先

生天下名士養其身以有用何得輕死即不屑
用世少芟數莖優游林下何如廷樞曰此與鼠
尾何異廷樞惟有一死不敢奉命國寶曰今亦
有薙髮為僧者先生何不出此廷樞曰全髮偷
生已非本願況薙髮逃死愈趨愈下矣廷樞無
顏再活人世願即賜死國寶乃曰楊先生忠義
如此不得不為先生成此大節廷樞點首謝曰
敬受賜遂慷慨就戮臨刑但呼 太祖高皇帝

不屈膝頭將落猶呼大明二字而死後交游贖
五十金贖出血衣流傳鄉內其鄉人葉褒云維
斗妻女尚在無死節事

劉曙號稚圭南直長洲人崇禎癸未進士生時
徐夢漢壽亭侯持送雷雨中幼敏慧年十三知

名庚午試南關已擬第一知貢舉事者不可竟落

壬午舉于鄉明年捷南宮蓋自曙為名士者三
十年因棘關者九而始一遇甲申曙家居聞變

與徐太史沂願同年咸正草檄討其鄉之後賊
某者義聲著三吳乙酉就選南都得南昌知縣
不果行六月自漵歸吳外艱護髮蠡口絕跡城
市當事心啣之而往從賊蒙討者益恨不欲與
曙俱生倡言諸當事曙等必欲為忠臣可畏丁
亥六月撫軍使人即曙伺虛寔曙呼偵者入露
髮示之曰吾頭可付一莖髮不與也負髮者在
若可令某自来偵者如曙言告撫軍十三日乘

吳鴻欽浩事猝拘曙蟲口并繫二子蕃蓀于郡
城曙訣姊曰見今日以忠報吾君以得為忠臣
報吾母願蕃蓀吾以身詔矣占絕命一詞灑泣
去比見撫軍兩向立左右聲曰屈膝曙怒叱之
屈誰膝我世受國恩起義復仇其分惜父死未
葬生母在堂今死不足塞責語不擇音卒箠楚
下頭創血濡地曙不為屈縛謝金陵人見有木
冠長丈餘者隨其後異之謂生時夢中之人翼

之也清臬坐鞠曙為明兩榜曙以義督之引謁
內院為極陳 先皇帝恩眷種：語未卒輒引
獄候報時二子亦被繫曙慮同死書以決之有
云我為忠臣汝為孝子當作吉祥善事觀此以
為苦獄中倣文信國亦自為年譜而後父劉晉
允百艱難為奔走幾不免久之復與子書曰吾
得死所矣 先帝身後社稷吾死不愧為 先
帝臣先座師汪先生文烈從容殉節同門孟章

明從之顧咸建繼之吾死不愧為汪天子門人
蓋顧兩君子同年友吾先世仲理公政以解首
出方正學之門後靖難兵起不食七日嘔血死
吾死不愧為先靖節裔吾祖母胡與從祖母兄
弟也偕苦寡選思得旌褒節吾死不愧為兩節
母孫吾得死所矣死若不識觀吾左臂創痕初
汝祖歿爲吾割寸肉以療此不化耳告刑者善
語諸公吾創其今日死歡喜連呼二祖列宗而

盡二子得免死為丁亥九月之十有九日

續孔教處州衛世襲指揮甲中國變即捐貲集義旅守衛本州丙戌北兵入括蒼力不敵乃散家資與麾下士入山避之有言孔教姓名於當道者孔教命僕自言於太守曰續孔教固不難頭難則寧死太守遣人捕之索其資孔教手數金予之曰家貲向已散盡今所存者貲身物也除予就死前支給外悉以予若入見太守不少

屈太守亦心敬之勸令去髮孔教不可乃解至
省冠服雍容談笑自若人問之曰何惜髮乃爾
曰余欲徃見先皇帝故余比至省撫按亦勸
之曰去髮即可得生孔教堅不肯曰江山已失
何惜一頭遂笑而受戮

沈履祥字其旋瀏江慈谿人崇禎丁丑進士授
侯官知縣憂去補甌寧乙酉魯王監國以御史
奉差台州運米因居台明年六月紹興失守監

國復至台入海履祥不及扈駕清兵至台：人
皆奉令薙髮履祥獨否遂與總戎李唐禧同被
執欲降之履祥不屈口占一律有山河破碎遺
全恨家室飄零任去塵之句收獄尋赴刑索明
冠帶西向拜者再南向拜者再然後出談笑不
改色唐禧松江金山衛指揮欽命總理恢勦浙
直總兵亦以護髮死之

鄭露字湛若廣東南海人少有才名為諸生繼

放下羈喜談諧工書常以五家書法應督學歲
試之劣棄去游吳越燕趙睥睨一時為詩綿麗
清和婉而多風鶴然傳位之中緩態清言有晉
代風流故一時少年爭慕效之永曆初以薦授
中書舍人不屑也清初下廣獲髮還鄉里庚寅
冬清復入廣露幅巾鵠衣抱其所愛綠綺古琴
步過兵中途梳其衣巾盡乃赤身仍抱琴立其
雨中不去兵以必覩之露曰此何物乃以相戲

兵以為瘋釋之薙髮令下曰豈有此理走入官衙懸樹死時年四十有七也

蔡孺法浙德清諸生也乙酉至九月諸義敗無不奉薙髮有不奉令鄉之人羣妬發之故非深山密林無漏者又強無賴每指為奇貨索金錢孺法獨抗不如制群以其素剛幹畏之舉兵二百餘舟走應陳萬良德清城下戰不利徐懋功死之萬良脫孺法亦亡去清當事迹縛其父與

弟索孺法孺法出髮猶在頂爭曰獨孺法受江
東命事不遂當死父弟常善許我因活父弟而
孺法死

石匱書曰余嘗讀文文山集有薙髮詩云面看
髻少原非我只要心存尚是人則文山亦曾薙
髮諸君子之死護髮頭至以身殉非謂此髮不
難為勝過文山弟恐文山之髮一落文山之心
與髮俱落故不若留髮殺身反得保全此魯男

子之所以善學柳下惠也嗚呼難哉

石匱書卷第二十九

左懋第列傳

左懋第號蘿石登州萊陽人崇禎辛未進士授
韓城知縣其時流寇躡山西突河津與韓城隔
一水懋第嚴為之備賊渡河入秦三年之中簿
韓城者三八其境者五前後皆以見兵設法擊
走之於是關中言保障者推韓城第一丙子考
選戶科給事中上䟽論事有直聲尋以吏科給

事中奉勅察核南京蕪湖池州安慶九江兵餉
未復命而烈皇帝升遐弘光立陞太常寺少卿
尋改都察院右僉都御史巡撫應安徽寧池太
廣德地方提督軍務兼理糧儲懋第以母喪乞
守制而朝議遣大臣使北營先帝山陵并議割
地歲幣懋第自請北行因得葬母陞兵部右侍
郎兼都察院右僉都御史經理河北聯各關東
軍務贖國書金幣以行而副之者太子太傳左

都督陳洪範太僕寺少卿兼兵部職方司郎中
馬紹愉兵部司務陳用極等從行九月至德州
清撫方大猷傳攝政王令明朝來使止許百人
赴京朝見十月至張家灣趣懋第入京館鴻臚
寺洪範趣見攝政王懋第曰勅命先謁陵後通
好未拜先帝梓宮不敢見往返再三不得請乃
陳太牢於寺堂祭之率將士哭三日陳洪範私
自請降并進錢謙益王鐸降表洪範欲以國書

昇禮部懋第言必以龍亭出迎不然勅書不可
與攝政王命於二十七日放歸十一月四日至
滄州復遣兵追執懋第等北去改禁太醫院十
二月獨放陳洪範歸南懋第羈縻半載乙酉五
月南都復陷懋第大慟攝政王遣其弟懋恭頻
來勸降必叱退之六月十五江南平下薙髮令
中軍艾大選私自髡首懋第立杖殺之遂捕下
刑部獄懋第即絕食七日不食攝政王復召見

懋第麻衣孝巾草履向上長揖南面坐地下攝
政王數以僞立福王勾引士寇不投國書擅殺
中軍當廷抗禮五大罪懋第抗詞惟請一死命
薙髮以刀脇之堅不肯攝政王恚怒遂於閏六
月十九日殺之作絕命詩有峽坼巢歸路迥
片雲南下意如何寸丹冷魄消難盡蕩作寒烟
絲不磨之句兵部司務陳用樞游擊王一晟都
司張良佐王廷佐守備劉統等五人請從死懋

第曰止殺我耳余輩何與可速去五人曰願隨
部主即死無恨同日斬於西市臨刑猶遣飛騎
傳諭僧子但於懋第口中得一降字即免死懋
第不出一聲遂被戮行刑時風沙四起捲市棚
于雲際屋瓦飛墮如雨一時罷市有諸生曹姓
者人皆目為狂士不與語聞懋第死撫屍哭之
婦攜其妻簪珥得百金營殮徒步扶櫬送至萊
陽櫬到即去不告姓名

石匱書曰古來出使匈奴謂不替臣節者無過
蘓子卿而當其處於大害齧雪收糒脩受僇辱
至為於軒王網紡繳擊弓弩受其馬畜服匿穹
廬可謂貶損極矣而左侍郎崛強負固侃々不
撓寧受斧鑕不受顧指其生死大節直與顏常
山文信公頽頽千古嗟乎子卿又出其下矣

石匱書卷第三十

鄭之龍列傳

石匱書卷第三十一

吳三桂列傳

石匱書卷第三十二

乙酉殉難列傳總論

烈矣哉門戶之禍人國家也我明之門戶日久
日甚萬曆之昔有門戶科道天啓之昔有門戶
宦官崇禎之昔有門戶宰相弘光之昔有門戶
天子夫天子未嘗有以門戶稱者稱之自弘光
始蓋弘光為福王世子挺擊妖書二案東林諸
君子之攻擊福王者不遺餘力為壓於光宗訖

未有以報復後福王死於流賊世子播遷寄跡
淮甸北變之後阮大鍼與馬士英謀以軍中欲
立福王一語遂以之定策天子蓋謂福王與東
林世仇立福王而大鍼與士英播煽其間則東
林自無噍類矣故福王立後遂定順黨與昔之
定逆黨者巧相礮擊周鍾光時亨死於西市項
煜時敏死於逃亡周銓周鑣死於詔獄使國祚
稍長其大獄且未有抵止阮大鍼之巧思辣手

其可輕犯也哉嗣後黃澍主謀左良玉提兵順
流而下清除君側之惡馬士英悉以重兵良將
阻截上江北兵乘虛而渡君去臣逃南都遂陷
弘光半耳天下祇為阮大鍼報復金壇周氏而
國亦隨盡食砒藥虎但欲死而不知己之食
砒先自潰裂吾未見其計之得也馬士英之在
南都賄賂公行日以骨董古畫為半閒堂軍國
大事彌天太保徧地司空衛爵賣官成何世界

當其醉聖酒魔幾同紂飲之失日而通國之人
盡飲狂泉無一得免而猶有捐軀殉主如劉成
治黃端伯輩者當皆濁皆醉之世而尚有揚波
啜醢之人教自性生道繇人立不幾為晦夜之
明星狂流之砥柱哉申生被驪姬之讒而恭為
其子文王受羑里之囚而恭為其臣是猶嫁亮
酒撒潑之夫以沉湎昏瞶而管逐其妻妾乃妻
妾不以為恨而當其喪亡之日猶欲為其守節

殉亡則與彼情深伉儷而願為之比翼連理者
不更難之難哉

徐石麒號虞求嘉興嘉善人天啓壬戌進士除
工部營繕司主事管節慎庫為權奄所惡以新
城侯王昇墳價事矯旨奪職崇禎改元疏辨補
原官歷南京禮部祠祭司吏部考功文選二司
主事陞考功司郎中歷南京尚寶司卿應天府
丞左右通政刑部右侍郎署部事陞尚書時

上以威刑馭下法官引律大抵深文附會比石
麒為侍郎奉旨清獄因惟明律意及近日斷獄
之不合于律者十餘條先以白之同官遂以次
審理十三司囚犯多所寬減而前兵部尚書陳
新甲以失事下獄石麒具獄上因發新甲議款
事言人臣無境外之交未有身在朝廷不告君
父而專擅便宜者今聖意未俞贅師先遣謾書
朝入名城夕隳昔石星未嘗私用惟敬袁崇煥

不敢私遣喇嘛抵以彌縫閃爍立置重典况辱
國啟侮甚於二臣者乎當失陷城寨律斬上
曰陳新甲失事重大法無可寬但引律尚屬未
確可另行覆擬即奏石麟奏新甲陷邊城四陷
腹城七十二陷親藩七此從來失事未有之奇
禍亦從來刑書所不忍載之條例者也當臨敵
缺乏不依期進兵策應因而失誤軍機者斬奏
上新甲棄市是時中朝多為新甲地者閣臣延

儒救解甚力 上不許石麟初疏旦上夕下詰
旦再疏復上即得旨肆之西市云新甲之黨皆
大恨而石麟復獻光祿寺少卿監軍張若麒臨
敵先逃失陷遼城當斬總兵許定國失誤軍機
搶殺人民當斬兵部尚書督師丁啟睿兵敗竄
逃棄去勅印當斬時石麟已位尚書笑一時大
法赫然無敢倖免者會禮科給事中姜埰行人
司司副熊開元以言事忤旨 上震怒下二臣

錦衣衛獄而左都御史劉宗周爭之甚力并奪
職石麒疏救不允及二臣發西曹復疏薄其罪
又不具招 上怒責令對狀罷官南京立起石
麒右都御史未至轉吏部尚書上定官制慎破
格行久任禁營求嚴起廢明保舉交堂簾七事
上優旨答之其時小人雜進官方濁亂石麒以
年例出戶科給事中陸朗御史黃耳鼎為藩臬
有旨特留用朗耳鼎遂疏訐石麒為吳昌時報

復又言殺新甲以敗款局石麒乃歷陳自有東
事以來主款之誤且言 先帝之誅新甲也曰
陷我七親藩夫七藩之中 恭皇帝居一焉
皇上忘之乎因引疾乞休命馳驛去明年南京
失國石麒起兵嘉興城破自經死贈某官謚忠
襄有子二人爾毅柱臣爾毅以松江事見殺而
柱臣輯所遺文行世皆能不負父志者城破時
有僕祖敏李謹皆從主自經

劉成治江西人崇禎甲戌進士為南京戶部主
事清兵至鎮江弘光逃遁忻城伯趙之龍上表
迎降先到戶部查錢糧封府庫以待成治握拳
起築之欲與俱死之龍驚遁成治至署自經於
堂上數日後猶面色如生

黃端伯字元公號海岸江西新城人崇禎戊辰
進士弘光時為禮部儀制主事乙酉五月南都
陷端伯以死自誓王子偁勒三四端伯僵卧不

起王子發馬騎擒之端伯衣冠進見南向植立
左右曰何不朝王端伯曰先帝已晏駕皇上又
不在我朝誰左右曰我家大王端伯曰你家大
王與我何涉王子命通事致意曰黃先生歎介
孤直予所素鑒當奏請重用端伯搖頭不應王
子又曰介執意不從豈不怕死端伯引頸曰不
怕不怕王子大怒引出斬之魯監國贈太常寺

卿謚忠節

高倬四川忠州人天啓乙丑進士官至工部尚書聞豫王至天壇文武朝見遂自經死

梁于溪字欽光山西籍南直江都人崇禎癸未進士授萬安知縣乙酉清兵陷江西湖西道彭期生以義師至萬安于溪大言曰公何事張惶彼敵垣者于溪稔知之苟馳尺書倒戈蒲伏至矣期生殊不然之嗣謁督師楊廷麟廷麟難其才氣表署于溪監軍道仍管萬安事時總兵白

之商呂兵三千屯萬安擾民，怨之之商入城
強索餉于溪諷居民閉城譟苦之兵乃大譁將
攻城廷麟飛檄出之商之商乃剗巡撫曠昭東
下降敬垣導清兵屠萬安于溪見執不屈繫南
昌獄清督金穀垣使人諭之降不答廷鞠于溪
偽曰願復至萬安呂故部三千人降敬垣許之
則密致故交戴國士欲潛通督撫萬元呂六
叔去行復仇國士發其事即日戮于市絕命詩

云但知生富貴誰識死功名到頭成個是方見
古人情又書獄壁云平生學佛得力到此撒手
懸崖妻張氏訣其屍清人迫之不辱亦自刎無
子呂佐枋爲子枋偶入清試忽狂語作父命云
勿完篇完則立殺汝病數日卒于溪妻某氏一
哭其柩而亡國士尋得罪清戊之滿洲

徐汧號勿齋蘄州長洲人崇禎戊辰進士改庶
吉士授簡討累遷右春坊右庶子辛巳以居喪

歸南京監國起詹事府少詹事兼翰林院侍讀
學士沂知事不可為不之官乙酉閏月清兵至
下令薙髮沂誓不屈辱曰以此不屈膝不被髮
之身見先帝于地下遂自沉于水而死自己已
之難沂從都中寄書故人曰明天子在上方知萬
萬無虞然事勢危急即有不可知惟以一死報
君父甲申之變時方里居號慟欲絕是年烈皇
聖誕感激賦詩四章言、血淚自題畫像曰沂

乎而忘甲申三月十九日事耶而受先皇厚恩
待以師臣之禮而子枋柯以穉子一登賢書一
食廩餼尺寸皆先皇賜也而不能斷脰納肝以
殉國難復不能請纓枕戈以雪國耻而息偃在
牀何為者耶義當寢苦罪當席藁存此寢苦席
藁之心以教誨爾子庶幾其勉于大義毋若厥
父之偷情負恩也蓋汧忠義出于天性報國捐
軀是其素志也

顧威正字端木蘄州崑山人贈太保文康之曾
孫崇禎六年舉人十三年以副榜除延安府推
官延安為流賊所自起連年大旱民皆闔戶死
且去為盜威正至招流民開荒地以田之無主
者立為官莊出私錢募人種之其年兩大熟明
年益墾田至二萬畝而又日夜興樹畜之利又
教民引水鑿池穿井作恒升車及捕蝗諸法又
謀引延水城南河延利渠及各邑之水略倣古

為溝洫以灌田且限步騎一切清隱占剔奸逋
之法無不備又奉檄督兵追賊朱明才等三百
餘人至直羅盡賊之又招降徇賊張成儒丁世
蕃等二百餘人慶陽土賊潘自安等千餘人于
是延中稍寧田亦多墾會總制孫傳庭徵兵將
出關咸正上書以為今日出關安危繫全秦全
秦安危繫天下軍志曰兵無選鋒曰北萬一蹉
跌將不止三秦之憂不聽傳庭敗沒賊入關陷

西安咸正率延營兵三百人登陴並弃甲去賊
遂執咸正降之不屈乃拘之營中薊國兵入關
秦中人多應之韓城人推咸正為主斬偽令王
業昌已而知為東兵遂入山中不肯起明年南
歸以全髮走二千餘里抵吳日夜籌所以報國
會雲間事起錄其黨姓名首及咸正乃與同事
四十餘人並死而其子天遼貢生天遴諸生以
藏陳子龍故亦死咸正弟咸建亦以不降見殺

季弟咸受天啓四年舉人城破亦死一門父子
兄弟五人同死國事吳中人士莫不悲之

顧咸建字漢石蘄州崑山人文康公四世孫也
年十六試南闈幾得優失困頓諸生三十年未
嘗挫志崇禎癸未成進士令錢塘甲申聞變號
慟幾不欲生乙酉以馬士英當國為疏糾之人
以非所當言止之咸建曰今日得所言而死
亦有益也若畏死不言後雖欲言而死得乎無

何清兵至武林咸建與潞王密議國是有所建
議巡撫張東貞從中抨之咸建憤曰事不可為
矣亟令妻子歸吳門張東貞降勒咸建納錢塘
縣印咸建痛哭不與尋復念曰我不納印累錢
塘一縣百姓矣強起應之歸縣即欲掛冠去或
告貝勒曰錢塘令潞王所與深謀者也其人才
望素著且大得民心宜亟用之否則亟殺之於
是以騎卒趣咸建咸建知不免曰往而死職也

廼具衣冠往見勒起握咸建手頽譯者啖以美
官咸建黻色甚厲頽蚤賜一死見勒不忍殺命
出就獄趨而出衣冠坐獄中不少變書於案云
國不可負親不可辱吾文康公孫汪夫子門人
若苟偷眎息所失多矣如所學所志何詰朝復
趣咸建入譯者曰公從則為抗嚴道不從則死
咸建曰死則死耳吾豈為一抗嚴道生哉復啖
以巡撫咸建踊而呼曰可速殺我遂徑出不顧

士民環擁呼號人散若沸或謂貝勒曰人才可惜事變亦可慮廼與同繫者四人就刑朝天門時六月二十日也是日暑甚擁至鎮海樓百姓男女遮道慟哭路不得前僧子皆哭不忍加刑咸建顧僧子曰我暴烈日下渴甚蚤一刻受一刺之賜僧子揮淚斫之以咸建及四人頭梟示鎮海樓上百姓祭奠者日數千人燒楮幣者如山積十日夜面猶如生餘首蠅蚋攢集而咸建

面無一蠅觀者駭異百姓哀號請命貝勒曰好官也命收塋之

唐自彩四川達州人以明經為臨安縣令乙酉貝勒至武林自彩懸冠綬去之臨安山中後自彩受魯監國勅陰部分為應縣官覺之申文部院逮至不屈斬之鎮海樓下至死罵不絕口佐階豫同被逮亦不屈與叔同死其故人陳某購其屍塋之西湖南山

陸培號鯤庭浙之仁和人也父運昌崇禎甲戌
進士授吉水縣有文名爲東林所推重培博學
好奇字爲文多難識以美言致譽己卯鄉闈大
座師危培不如式本房豫章文德翼奇其才至
作狀以身保之庚辰遂成進士然卒以奇字得
達不更爲也弘光中授行人司行人乙酉五月
南都陷六月清兵至武林培以家人避黃山時
錢塘知縣顧咸建以不屈見殺清爲令益嚴勒

朝所為諸紳士五日不赴者兵至其門及培且
曰即不出吾發培先塚培笑曰吾陸鯤庭豈有
朝清之理遂拜辭毋去潛自縊死遺囑陳尸通
衢以絕清之跡培者魯監國贈太常少卿與謚
蔭培絕命詞有雍國尚慚收采石荆胥無計乞
秦兵及千官推髻金魚麗萬壽青衣玉壘空之
句

王道焜字昭平淞江錢塘人性敏達目數行下

試每冠軍為王慕參蔡虛齋所賞識精書法詩
自為家經史而外亦嫺歌事天啓辛酉闈畢聊
用解朝天明報至魁麟經尚着髭鬚登場徘徊
不肯去衆奪之輒以戲袍履赴宴謁主司一時
傳以為風騷嘗過鄱陽風濤大作夢龍神乞句
為二聯投水贈之浪遽息久不第就選南平縣
廉不諧俗治有殺墜二南雄府却无澤妖亂父
老賴之改邵武以大夫銜與考選蓋異數也弘

光中起吏部清史司主事乙酉六月清兵至制
所用士多明孝廉朱圖隆為平湖知縣吳佩為
嘉善知縣彭萬里為山陰知縣張堯揚為海寧
知縣朱永祚為烏程知縣沈希畢為新城知縣
唐士晟為武康知縣陳之杰為海鹽知縣陶梁
棟為臨安知縣共十七人而諸生顧鳴彪為杭
州府知府皆不次時道焜既避武康清令責朝
急廼復入城闔故廬謝使曰道焜老病且死必

欲見道焜輿觀來也繼責其子均出見均爲壬午賢書道焜曰須使者明日來果明日登其堂呼均則道焜已自殺尸橫地衆愕去以狀還報因不深求均甲午清督學張崇祀道焜鄉賢而故十七人皆爲其治弄兵者所殺

盧象觀宜興人總督象昇弟也崇禎壬午以南京解元癸未成進士清兵渡江象觀破家糾衆起義太湖清兵往來道湖口者悉出奇要截之

道路為艱清兵深患之後兵敗鏖戰死於陣

葛麟丹陽人崇禎壬午鄉薦南都繼陷麟集精銳起義丹陽意欲振旅薄京以圖恢復清兵并力攻之麟死於陣麟雖文士貌如武人有膂力能開數石弓齎志而歿人多憐之

睦明永字嵩年鎮江丹陽人曾大父燦官給事父石官太史皆有能名明永性慷慨好義為古文詩歌才氣奔放楷書顏魯公法崇禎十五年舉

予鄉年六十美上春官不第謁選華亭教諭楷
摸多士為一時所稱踰斗聞北都陷遺予本書
曰生無以報先帝吾所以不死者喪君有君
故也乙酉八月三日城破公書明倫堂曰明命
其永嵩祝何年生忝祖父死依聖賢遂自經不
死出投泮水被執以不屈而死予本為諸生亦
善詩工楷法自父死號慕哀吟誓不復出甲午
春坐同邑賀太僕王盛事株連被繫一夕死論

者以為不愧其父

溫璜原名以介字介石淞烏程人崇禎癸未進士出吳忠節甘來之門為徽州司理甲申國變哭臨如禮并設師位于亭左三日衰服抱其師主婦私署號哭于路士民見者皆為之涕下乙酉清兵渡江南郡縣望風解綬璜亦潛遁以家口匿山中閏六月金穀約共事部郡兵猝復府城守之數月以被間事敗城復陷璜疾走故

匿山中呼夫人立令之先縊死有二女已笄璜
手办之僅一幼子為徽民抱去清兵追至被執
給之曰我有金寶在司李署押我往取至署璜
取進賢冠着頭上大罵曰我廉吏安得金寶我
恐妻女受辱往鄉速之死耳我刑官應死刑署
故給爾送我至此遂奪刀自刎未殊張天祿昇
至營中百方救護夜半復甦方知身在營中復
觸石而絕

郭符甲閩人天啓甲子鄉薦出初忠敏門下為
孝廉二十年歲資脩脯僅足養母無童僕唯一
老嫗應門士林目為海忠介一流人稱為介庵
先生乙酉起義於閩中兵敗死之時方酷暑七
日後百屍俱敗獨一屍砍頸下未殊而顏色不
改視之則符甲也為收葬之

汪志援婺源人崇禎壬午鄉薦乙酉起義樂平
與同事諸人分道進兵志援兵先遇敵陷圍中

志援大呼曰願諸君努力廝殺勿以我死而隳
心清兵合圍射之背矢如蝟毛罵不絕口而死
汪碩畫休寧人崇禎朝為邊塞叅將有詩才傳
其詩有彞齊不改殷腸胃馮鄧猶安漠鬼神之
句黃道周與交常稱之乙酉南都陷道周率閔
師出信州碩畫往逆星源失碩畫捍信城一年
金穀桓發省騎萬餘圍之三月援絕被執穀桓
與碩畫夙盟百計誘降閉目不與通一語穀桓

知不可奪乃設牲醴生祭之殺於廣潤門外
馬嘉初門人崇禎壬午鄉薦乙酉清兵入徽州
行薙髮令嘉獨不屈具衣冠南向再拜自縊死
之

王域號兩瞻松江華亭人天啓元年舉人在家
以孝友聞除宿州學正流賊犯州域身親戎事
峙糧繕器率士民固守城賴以全歷國子學錄
監丞工部虞衡司主事會有討城之役以勞奉

旨加俸差督餉務兼理蕪湖關其時上游盜賊充斥道路多梗而稅額頻增以爲商病域上疏請復舊制以蘇商困久之竟得 俞旨復擒巨盜數十人江路無壅督銅鉛數十萬勛復 命至揚州聞京師之變報解南部一無所私陞本司郎中其年十月陞建昌知府加銜江西按察司副使北兵陷撫州城誓衆固守而城中有內應者遂陷益王出走城被執至南昌大罵不屈

送武昌殺之時八月二十日同死者江西右布政夏萬亨分巡湖廣道副使王養正推官劉允浩等與域六人並傳首江西棄其屍城下武昌人收而葬之於沌砦河題曰六君子之墓第三子鑰走福京請卹未覆閩中陷不果

趙璘字玉如浙江慈谿人崇禎戊辰進士初授侯官知縣行取考入詞林忤時貴改調息儀陞工部郎中出脩兵河間壬午清兵深入璘抗守

七月久之兵食兩絀城陷清隊有珽同鄉勸之
降珽罵不絕聲清洞其胸死城上而印尚懸臂
全家十四口俱殉詔贈大理寺卿賜祭奠廕一
子入監讀書子先卒呂孫昌胤代

龔廷祥無錫人崇禎癸未進士弘光時為行人
弘光棄南京遁百官多以護蹕遠竄廷祥獨閉
署不出及裨王至宰相以下皆報冊投誠廷祥
以公服投秦淮河中死

石匱書曰自古亡國之君無過吾弘光者漢獻之孱弱劉禪之癡痞楊廣之荒淫合併而成一人王毓著曰只要敗國亡家亦不消下此全力也嗟、帝曷死而趙氏肉盡張陸諸君子亦死趙氏耳死肉乎哉

附張捷楊維垣

張捷字赤涵南直丹陽人萬曆癸丑進士初授山陰縣令有能殺擢監察御史歷官陝西按察

司副使致仕魏璫用事驟陞太僕寺少卿璫敗
為民庾平復原官辛未歷吏部左侍郎 烈皇
帝用古賢良方正之科搜忽薦逆案霍維華堪
用舉朝大駭 上震怒尋科臣吳甘來特疏劾
之 上立戍搜而廷臣呼之曰大胆張捷此崇
禎乙亥年事也甲申復起原官以國變去乙酉
南都改元以大學士馮士英薦代王永光為吏
部尚書搜與阮大鍼楊維垣等黨比酷與東林

為難請改謚文震益而復溫體仁文忠之謚復
請以成國公朱純臣宜炤張輔例贈舒城王純
臣者闕索餉不及額刑死者也上為之先行又
請表章三案及左袒鄭貴妃諸臣劉廷元等九
人宜謚廕祭奠徐揚先等六人宜贈官祭奠王
紹徽等四人宜各復其官未幾帝弃都城走捷
匿鷄鳴寺裂繡繡自縊寺僧解救衛視甚謹提
與僧懷璧同寢乃私語懷璧曰我欲全節須念

成之懷壁唯之遂自經死之

楊維垣北直彭城衛籍山東文登人萬曆丙辰
進士歷官冀北道副使天啟間魏璫用事維垣
疏頌功德驟復雲南道御史巡按河南丁邠加
太常寺少卿河東巡鹽寔授太僕寺少卿璫敗
又極口醜詆忠賢為倪元璐所摘發仍錮逆案
罪城旦甲申北變弘光監國阮大鍼為魏黨翻
案首用維垣為左都御史酷與馬士英阮大鍼

阿含攻擊東林不遺餘力請反坐王之案孫慎
行楊漣等之罪復刊行三朝要典又請卹三案
被罪諸臣乙酉北騎渡江弘光霄遁維垣墜樓
裂其腦不得死復上樓投繯以一椅坐桌上呼
其弟推倒其桌其弟蒙面急走須臾氣絕

石匱書曰王子明可殺也然不可即殺亦不必
即殺張捷揚維垣日以殺王子明為事者也黃
得功之疏不至子明已幾死犴狴矣迨弘光霄

遁而留都百姓出子明於獄加以袍冕而居事
之乃不能忘情於殺子明之張搜揚維垣而張
搜揚維垣亦不得不爲子明而死矣是蓋乙酉
死而非死乙酉者也附之者外之也